



## Cynhyrchwyd ar ran: AQA, CBAC, CCEA, OCR a Pearson

### Hysbysiad i Ganolfannau

#### Hysbysu ymgeiswyr o'u marciau a aseswyd gan y ganolfan

Am flynyddoedd lawer bu gofyn i ganolfannau sicrhau bod ganddynt weithdrefn apeliadau mewnol ysgrifenedig sy'n ymwneud â phenderfyniadau asesu mewnol. Yn rhan o'r weithdrefn hon, mae'n **rhaid** rhoi gwybod i ymgeiswyr pa farc y dyfarnodd eu canolfan iddynt am gydran/uned a asesir gan y ganolfan. Mae hyn yn berthnasol i gymwysterau TAG, TGAU a Phroject (**ond gweler cwestiwn 1, tudalen 2**).

Bwriad y gofyniad hwn yw galluogi ymgeiswyr i wneud cais am adolygiad o farcio'r ganolfan cyn cyflwyno'r marciau i'r corff dyfarnu, os ydyn nhw'n dymuno gwneud hynny, a bydd yn hwyluso'r broses o adolygiad teg. Adlewyrchir hynny yn nogfen *Amodau a Gofynion Lefel Cymhwyster y rheoleiddwyr*.

Dylai canolfannau ddefnyddio'r broses safoni fewnol i sicrhau bod pob athro yn hyderus wrth gymhwyso safon y marcio yn gywir ac yn fanwl. Dylid defnyddio deunydd enghreifftiol ac unrhyw ganllawiau a ddarperir gan y corff dyfarnu. Dylai hyn helpu i atal gwallau marcio.

Er bod nifer o gonsortia, er enghraifft Ymddiriedolaethau Aml-Academi yn debygol o ddilyn gweithdrefnau cyffredin, y ganolfan unigol sydd i bennu sut i reoli cais am adolygiad o farcio. Bydd y dyddiadau cau a osodwyd ar gyfer marcio, trefniadau safoni mewnol, trefniadau staffio ac adnoddau i gyd yn ffactorau dylanwadol. Gellir rhoi rhyddid i bob Adran Pwnc gymhwyso'r gofynion yn y ffordd fwyaf ymarferol.

**Rhaid** i ganolfannau gael gweithdrefn apeliadau mewnol ysgrifenedig sy'n ymwneud â phenderfyniadau asesu mewnol ym mhob cymhwyster. **Rhaid** i fanylion y weithdrefn hon gael eu rhannu'n eang a rhaid iddynt fod yn hygyrch i bob ymgeisydd. Mae templed y gall canolfannau ei ddefnyddio i'w gael yn:

<https://www.jcq.org.uk/exams-office/non-examination-assessments/>

Mae manylion pellach i'w cael yng nghyhoeddiad y CGC *Cyfarwyddiadau ar gynnal asesiadau di-arholiad*:  
[https://www.cbac.co.uk/home/gweinyddu/dogfennau-cgc/#tab\\_0](https://www.cbac.co.uk/home/gweinyddu/dogfennau-cgc/#tab_0)

Mae cyrff dyfarnu sy'n aelodau o'r CGC wedi llunio rhai Cwestiynau Cyffredin sydd wedi'u nodi ar dudalennau 2-7.

## Cwestiynau Cyffredin (FAQs)

### Ble mae'r gofyniad yn berthnasol?

#### 1. A yw'r gofyniad i hysbysu ymgeiswyr o'u marciau canolfan yn berthnasol i gymwysterau ar wahân i gymwysterau TAG, TGAU a Phroject?

Er bod y gofyniad i hysbysu ymgeiswyr o'u marciau yn berthnasol i gymwysterau TAG, TGAU a Phroject yn unig, atgoffir canolfannau o'r hyn a nodir yng nghyhoeddiad y CGC Rheoliadau Cyffredinol ar gyfer Canolfannau Cymeradwy. Mae'r ddogfen hon yn nodi bod yn **rhaid** i ganolfannau gael gweithdrefn apeliadau mewnol ysgrifenedig sy'n ymwneud â phenderfyniadau asesu mewnol ym mhob cymhwyster. **Rhaid** i fanylion y weithdrefn hon gael eu rhannu'n eang a rhaid iddynt fod yn hygyrch i bob ymgeisydd. Rhan bwysig o'r weithdrefn hon yw sicrhau bod eu marciau ar gael i ymgeiswyr.

Gellir llwytho i lawr gyhoeddiad y CGC Rheoliadau Cyffredinol ar gyfer Canolfannau Cymeradwy o wefan y CGC: [https://www.cbac.co.uk/home/gweinyddu/dogfennau-cgc/#tab\\_0](https://www.cbac.co.uk/home/gweinyddu/dogfennau-cgc/#tab_0)

#### 2. A yw'r gofyniad i hysbysu ymgeiswyr o'u marciau canolfan yn berthnasol i'r Gymeradwyaeth Iaith Lafar ar gyfer TGAU Saesneg Iaith a'r Gymeradwyaeth Sgiliau Ymarferol ar gyfer y Gwyddorau Safon Uwch (Cymwysterau wedi'u hachredu gan Ofqual yn unig)?

**Ydy.** Efallai bydd tystiolaeth yn gyfyngedig ond gallai gynnwys cofnodion ysgrifenedig ac, yn yr iaith Lafar, recordiadau cymeradwyaeth, os ydyn nhw ar gael.

#### 3. A yw'r gofyniad i hysbysu ymgeiswyr o'u marciau canolfan yn berthnasol i gymwysterau sydd â mwy nag un gydran a asesir yn fewnol, e.e. i'r ddwy gydran Celf a Dylunio, sy'n cael eu hasesu 100% yn fewnol, ac a oes rhaid rhoi marciau ar gyfer yr holl gydrannau a asesir yn fewnol i ymgeiswyr?

**Ydy.** Ym mhwnc Celf a Dylunio, ynghyd â phynciau eraill sydd â mwy nag un gydran a asesir yn fewnol, mae'n rhaid rhoi marciau ymgeiswyr i gyd iddyn nhw a gallan nhw wneud cais am adolygiad o un neu fwy o'r marciau hynny.

### Cais am Adolygiad

#### 4. Beth ddylai canolfan ei wneud os caiff ei herio am farc ymgeisydd cyn cymedroli?

Yn y lle cyntaf dylai'r ganolfan ddilyn ei gweithdrefn apeliadau mewnol gyhoeddedig, y mae'n **rhaid** i'r ganolfan nodi ei threfniadau ynddi ar gyfer cynnal adolygiad o farciau a asesir yn fewnol. Dylai canlyniad yr adolygiad bennu'r marc sydd i'w gyflwyno i'r corff dyfarnu.

Yr egwyddor yw bod y ganolfan yn cyflwyno marciau sydd wedi eu cymedroli'n fewnol ganddi cyn eu cyflwyno i'r corff dyfarnu. Yna bydd hyn yn galluogi cynnal proses gymedroli'r corff dyfarnu yn llwyddiannus.

**5. Beth ddylai canolfan ei wneud os yw'n cael ei herio am farc ymgeisydd ar ôl cymedroli?**

Mae'n **rhaidd** cwblhau'r broses adolygu fewnol cyn dyddiad cau'r corff dyfarnu ar gyfer cyflwyno marciau. Mae'n **rhaidd** rhoi gwybod i unrhyw ymgeisydd sy'n cyflwyno ceisiadau hwyrach am adolygiad eu bod yn rhy hwyr. Mae'n **rhaidd** i ganolfannau gyhoeddi a rhannu terfynau amser clir â'r ymgeiswyr fel y gallant wneud cais am adolygiad o'r marc cyn y dyddiad cyflwyno marciau.

**6. Pa ddeunyddiau dylai'r ganolfan sicrhau eu bod ar gael i ymgeiswyr fel y gallant benderfynu a ydyn nhw am barhau â chais am adolygiad o asesiad mewnol?**

Yn gyffredinol, dylai copïau o'r deunyddiau asesu wedi'u marcio a'r cynllun marcio neu'r meini prawf asesu fod ar gael, o leiaf. Gall deunyddiau ychwanegol amrywio o bwnc i bwnc. Ar gyfer rhai deunyddiau asesu wedi'u marcio, fel celfwaith a recordiadau, efallai y byddai'n fwy priodol eu rhannu dan amodau o dan oruchwyliaeth.

**7. Beth yw ystyr 'digon o amser' i ymgeisydd astudio copïau o ddeunyddiau a phenderfynu p'un a yw'n dymuno gofyn am adolygiad o'r marc a roddwyd gan y ganolfan?**

Dylai canolfannau caniatáu o leiaf bum diwrnod gwaith fel arfer. Gallai hyn amrywio, yn dibynnu ar, er enghraifft, y pwnc, maint y garfan a nifer yr athrawon ar gyfer y pwnc hwnnw yn y ganolfan. Dylai canolfannau roi dyddiad cau clir i ymgeiswyr, gan ystyried yr amser y bydd ei angen i adolygu unrhyw farciau a chyflwyno'r marciau terfynol i'r corff dyfarnu erbyn y dyddiad cau swyddogol. **Ni ddylid** caniatáu i ymgeiswyr ddefnyddio deunydd asesu gwreiddiol, yn cynnwys arteffactau, oni bai eu bod yn cael eu goruchwyllo.

**8. A fydd corff dyfarnu yn caniatáu i farciau a asesir gan y ganolfan gael eu cyflwyno ar ôl y dyddiad cau sydd wedi'i gyhoeddi yn benodol i fodloni ceisiadau ymgeiswyr am adolygiadau o asesiad mewnol?**

**Na fydd. Ni fydd** corff dyfarnu yn caniatáu i ganolfan gyflwyno marciau a asesir yn y ganolfan ar ôl y dyddiad cau yn benodol i fodloni ceisiadau ymgeiswyr am adolygiadau o asesiad mewnol. Mae angen cwblhau adolygiad erbyn dyddiad cau cyflwyno marciau i'r corff dyfarnu.

**9. Ai'r unig amser y gall ymgeisydd wneud cais am adolygiad o farc asesiad mewnol yw ar ôl canfod problem neu broblemau?**

Dylai canolfannau hysbysu ymgeiswyr y bydd angen iddyn nhw esbonio ar ba sail y maen nhw am wneud cais am adolygiad o farc asesiad mewnol. Efallai y bydd canolfannau yn dymuno diystyru cwynion ynglŷn ag ansawdd addysgu gan y bydd yr adolygiad yn canolbwyntio ar ansawdd y gwaith a gyflwynwyd. Ar ôl adolygu'r copïau o ddeunyddiau sydd ar gael iddo/iddi, bydd angen i'r ymgeisydd esbonio beth yw'r broblem yn ei farn ef/hi.

Yn y rhan fwyaf o achosion mae'n debygol y bydd ymgeiswyr sy'n gwneud cais am adolygiadau yn credu nad yw'r marciau a ddyfarnwyd iddyn nhw yn rhoi credyd digonol am fodloni'r meini prawf asesu yn y deunyddiau asesu. Yn gyffredinol, mae ymgeiswyr yn annhebygol o wneud cais am adolygiad ar y sail nad yw eu marc yn cyfateb i'r safonau a osodwyd gan y ganolfan. Pwrpas rhoi'r meini prawf asesu i ymgeiswyr yw eu galluogi i werthuso p'un a yw'r meini prawf wedi'u cymhwyso'n gywir.

Mae'n bwysig bod ymgeiswyr yn deall y gallai'r broses gymedroli a gynhelir gan y cyrff dyfarnu arwain at newid marc, naill ai i fyny neu i lawr, hyd yn oed ar ôl adolygiad mewnol. Mae'r broses adolygu mewnol wedi'i sefydlu er mwyn sicrhau cysondeb y marcio yn y ganolfan. Mae cymedroli gan y corff dyfarnu yn sicrhau bod marcio canolfannau yn unol â safonau cenedlaethol. Gallai'r marc a gyflwynwyd i'r corff dyfarnu newid ac felly dylid ei ystyried yn farc dros dro.

## **10. A yw'r ganolfan yn cael codi tâl ar ymgeiswyr am adolygiad mewnol?**

Penderfyniad y ganolfan yw hyn yn llwyr, a gall gyfateb o bosibl i unrhyw bolisiau eraill y ganolfan yn ymwneud â chodi tâl am wasanaethau, megis gwiriadau clerigol ac adolygiadau o farcio corff dyfarnu.

### **Yr Adolygiad**

## **11. A ddylid adolygu'r marc a ddyfarnwyd ynteu'r broses sy'n arwain at ddyfarnu'r marc?**

Dylid adolygu'r marc a ddyfarnwyd, gan gadarnhau p'un a yw marc yr ymgeisydd yn unol â'r safon a osodwyd ar gyfer yr ymgeiswyr eraill yn y ganolfan ai peidio. Bydd y canlynol yn cael ei adolygu:

- gwaith yr ymgeisydd (lle mae'r dystiolaeth o hyn yn fyrhoedlog, er enghraifft ym mhynciau Drama neu Gerddoriaeth, yna dylid rhoi recordiad o'r gwaith i'r adolygwr);
- y daflen farciau a gwblhawyd gan yr athro sydd fel arfer yn dangos y dyraniad marciau fesul Amcan Asesu (AA) neu adran o'r cynllun marcio;
- gwybodaeth ynghylch unrhyw safoni mewnol i ganfod p'un a gymhwyswyd safonau cyson at waith yr ymgeisydd hwn gan y marciwr gwreiddiol; a
- unrhyw sylwadau/anodiadau a wnaed gan yr athro yn ystod y broses farcio.

(Gweler hefyd gwestiwn 14).

## **12. Pwy ddylai gynnal yr adolygiad o farc a aseswyd yn fewnol lle mae'r ymgeisydd yn gwneud cais am un?**

Mae'n **rhaid** i'r adolygiad gael ei gynnal gan aseswr sydd â chymhwysedd priodol, sydd heb ymwneud ag asesu'r ymgeisydd yn y gydran dan sylw o gwbl yn flaenorol, a heb fudd personol o gwbl yng nghanlyniad yr adolygiad.

Gall naill ai fod yn athro arall yn y ganolfan, neu'n athro o ganolfan arall.

Fodd bynnag, byddai angen i'r ganolfan sicrhau bod yr adolygwr wedi datgan unrhyw wrthdaro buddiannau cyn cynnal yr adolygiad.

Mae'n dderbyniol i athro, sydd wedi cael ei safoni'n fewnol, adolygu gwaith ymgeisydd sydd wedi'i farcio gan athro arall yn yr un ganolfan. Fodd bynnag, os oedd gwaith yr ymgeisydd yn rhan o broses safoni mewnol y ganolfan, ni fyddai'n bosibl i'r athro a gymerodd ran yn y broses safoni fewnol adolygu gwaith yr ymgeisydd ar ôl hynny.

**Ar gyfer canolfannau mawr**, gallai trefniadau safoni mewnol alluogi is-grwpiau gwahanol o athrawon i farcio, safoni a chynnal unrhyw adolygiadau mewn trefniant matrices.

**Ar gyfer canolfannau bach**, lle mae ychydig o staff yn unig, gall fod angen i'r ganolfan ystyried p'un a oedd yr ymgeisydd dan sylw 'yn y sampl' i'w safoni'n fewnol ai peidio, ac felly eisoes wedi'i weld gan y staff Adrannol i gyd. Efallai yr hoffai'r ganolfan ystyried safoni aelod arall o staff mewn adran arall, mewn pwnc cysylltiedig, er mwyn cynnal adolygiadau o farcio. Fel arall gallai'r ganolfan anfon allan gwaith adolygiadau o farcio, er enghraifft i athro mewn ysgol arall.

### **13. A fydd anfon allan adolygiad o farc asesu mewnol yn torri cyfrinachedd deunyddiau asesu a data ymgeisydd?**

**Na fydd.** Ni ddylid trafod deunyddiau asesu cyfrinachol ag unrhyw berson nad yw'n uniongyrchol gysylltiedig â'r gwaith o gynnal nac asesu'r dasg/tasgau, na'u hanfon atyn nhw. Fodd bynnag, oherwydd bod yr adolygwr yn gysylltiedig â'r broses asesu, nid yw cyfrinachedd yn cael ei dorri. O ran data ymgeisydd, mae'n rhaid i unrhyw bartion allanol gydymffurfio â pholisi diogelu data'r ganolfan.

### **14. Sut dylid cynnal yr adolygiad?**

Gall gwahanol ddulliau gweithredu fod yr un mor ddilys â'i gilydd, yn dibynnu ar y pwnc penodol. Fodd bynnag, nid yw tasg yr adolygwr yn amrywio. Mae'n bwysig bod yr adolygwr yn cael rhai deunyddiau o broses safoni mewnol y ganolfan a gynhaliwyd cyn rhyddhau'r marciau i ymgeiswyr, yn ogystal â'r gwaith sy'n cael ei adolygu. Bydd angen i ganolfannau sicrhau eu bod yn cadw deunyddiau safoni mewnol at y pwrpas hwn. Byddai angen i'r adolygwr weld gwaith yr ymgeisydd, taflen farciau'r aseswr mewnol ac unrhyw anodiadau neu sylwadau sy'n dangos sut/pam y dyfarnwyd marc penodol.

Mae'n **rhaid** ystyried y rhain yng nghyd-destun y deunyddiau safoni mewnol a ddarparwyd er mwyn sicrhau dull cyson ar gyfer ymgeiswyr eraill yn yr un ganolfan. Lle na chynhaliwyd unrhyw safoni mewnol (oherwydd bod un athro yn unig yn ymwneud â marcio'r gydran), mae'n rhaid ystyried gwaith ymgeiswyr eraill yn y garfan i sicrhau y gellir gwneud penderfyniadau ar gysondeb safonau.

Argymhellir bod yr adolygiad yn digwydd yn y ganolfan er mwyn cynnal cywirdeb y gwaith ac i sicrhau ei fod yn cael ei storio'n ddiogel. Os oes rhaid cynnal yr adolygiad o bell, yna dylid cadw'r deunyddiau gwreiddiol yn y ganolfan, a dylid rhoi copïau o waith yr ymgeisydd i'r adolygwr.

Mae'n **rhaid** ei gwneud yn glir i'r adolygwr, yr athro a'r ymgeisydd na chaniateir i unrhyw un newid y gwaith ar ôl i'r aseswr mewnol ddarparu marc ar gyfer yr ymgeisydd.

Mae'n rhaid i'r adolygwr roi rheswm dros gadarnhau neu newid y marc a ddyfarnwyd gan y ganolfan. Gallai hyn fod yn anodi byr ar y ffurflen gofnodi, yn dangos crynodeb yr adolygwr o'r marciau fesul Amcan Asesu (AA) neu adran.

Rhaid i'r ymgeisydd gael ei hysbysu yn ysgrifenedig o ganlyniad yr adolygiad. Dylid hefyd ei logio a'i ddwyn i sylw pennaeth y ganolfan. Mae'n rhaid i'r cofnod ysgrifenedig fod ar gael i'r corff dyfarnu ar gais. Mae'n **rhaid** i'r ganolfan roi gwybod i'r corff dyfarnu os nad ydyn nhw'n derbyn canlyniad adolygiad.

Os yw'r adolygiad yn codi pryderon ehangach, er enghraifft am y ffordd y cymhwysodd y ganolfan y meini prawf asesu, dylai'r adolygwr drafod y rhain gyda'r pennaeth adran/pennaeth y ganolfan fel sy'n ofynnol. Dylid ceisio cyngor pellach gan y corff dyfarnu os yn briodol.

### **15. Os yw adolygwr allanol yn anghytuno â'r marcio, a oes rhaid i'r ganolfan dderbyn y marc newydd?**

Dylid cyfarwyddo'r adolygwr i sicrhau bod marc yr ymgeisydd yn gyson â safon marcio'r ganolfan. Mae'n ofynnol iddo/iddi gywiro unrhyw wall marcio.

Y tri math o wall marcio yw:

- gwall gweinyddol;
- methiant i gymhwyso'r meini prawf marcio at y dystiolaeth a gynhyrchwyd gan yr ymgeisydd lle nad oedd y methiant hwnnw yn cynnwys arfer barn academiaidd; neu
- arfer barn academiaidd yn afresymol.

Os yw'r adolygwr yn penderfynu bod gwall marcio, mae'n **rhaid** iddo/iddi ddangos lle mae'r gwall marcio hwnnw wedi digwydd a sut nad yw'r marc yn cyfateb i safon ymgeiswyr eraill yn y ganolfan. Penderfyniad y ganolfan yw p'un a yw unrhyw wahaniaeth yn y marcio hwnnw o fewn unrhyw oddefiannau y byddai'r ganolfan yn eu caniatáu yn ystod ei phroses safoni mewnol. Pennaeth y ganolfan fydd yn penderfynu os oes unrhyw anghytuno ar y marc i'w gyflwyno i'r corff dyfarnu.

Mae'n **rhaid** i'r ganolfan roi gwybod i'r corff dyfarnu os nad ydyn nhw'n derbyn canlyniad adolygiad.

## **Ar ôl yr adolygiad**

### **16. A fydd y corff dyfarnu yn gofyn i'r ganolfan gyflwyno'r gwaith a adolygwyd i'w gymedroli?**

Bydd y corff dyfarnu yn defnyddio ei system samplu safonol i nodi gwaith ymgeiswyr i'w gyflwyno i'w gymedroli. Gallai hyn gynnwys ymgeiswyr yr adolygwyd eu marciau.

### **17. A all ymgeiswyr gynhyrchu gwaith ychwanegol ar ôl canlyniad adolygiad er mwyn gwella'r marc sydd wedi'i ddyfarnu iddyn nhw gan y ganolfan?**

**Na allant.** Nid cyfle i ymgeiswyr geisio gwella eu marc ar ôl dyddiad cau cyflwyno gwaith terfynol y ganolfan yw hwn. Pwrpas penodol y gwasanaeth yw rhoi cyfle i herio'r marc a ddyfarnwyd gan y ganolfan, ar waith a gyflwynwyd eisoes i'w asesu.

**18. Pwy sydd â'r cyfrifoldeb cyfreithiol am degwch a chyfreithlondeb y marciau a'r graddau a ddyfarnwyd?**

Y ganolfan sy'n gyfrifol am ddilyn y rheoliadau a'r prosesau a osodwyd gan gorff dyfarnu, yn cynnwys y rhai ar gyfer asesu mewnol. Dylid cyfeirio unrhyw her gyfreithiol a wnaed yn erbyn canolfan ynglŷn â marc a ddyfarnwyd yn rhan o gymhwyster at y corff dyfarnu perthnasol.

Fodd bynnag, os gwneir yr her cyn i'r cymedroli ddigwydd, byddai angen i'r achwynydd aros tan i'r broses gymedroli gael ei chwblhau. Yn rhan o her o'r fath, byddai angen i'r corff dyfarnu fodloni ei hun fod y ganolfan wedi dilyn y prosesau cywir. Cyrff dyfarnu sy'n gyfrifol am y graddau a'r dyfarniadau a wnânt.